

Takurda-o Burus ayoore-o o wu gene Timoti

Rem-se ro n-me à:

M-zantɛ 1:1-2

Ur-bongon, un do ye un jaab-o ur-hur ne 1:3—
2:13

Ya-ut-ma ur-kewes ne 2:14—4:5

Ma-ut Burus to un hi un de un wu 4:6-18

Ur-kom 4:19-22

Ur-gas

¹⁻² **Timoti**, me Burus, ko-yan-tom **Kiristi*** Yeso, ro wo genen ka takurda-o. Me Burus, ko-yan-tom **Kiristi** Yeso, remen Shir conog kaane. Shir tomog me, um ko'ote ma-to un swor o-nu o un hoog. Ka hoog-o ro be-ur **Kiristi** Yeso.

Timoti, wa re, me m-was un wo ne deen. Me us-kon Shir Tato na un **Kiristi** ne Yeso Wan-Koyan na rem ru. Me us-kon wu kutu wo yar-mo Shir, wu gut wo ur-'won ne. Komo wu 'ye wo gwugwu-mo ur-hur.†

*Burus doote Timoti jaab-o ut-men,
wu nomot senge-mo Shir ya'ase wu à*

³ Me m-bom un Shir, wu me m-nome m-guw à. Bo tat-ne re ye n-ga nome wu m-guw à, um nomotu wu m-guw un hur-ur gaan. Koyanda

* **Bor-o gaan:1-2 1:1-2** Wu Shir daagne à. † **Bor-o gaan:1-2 1:1-2** Hyen komo: Seng 16:1.

mɛ ro ʊs-kɔn rem ru, m-hɔw, m-tɛt nɛ, mɛ ʊn bɔngɔn-de Shir.

⁴ Mɛ bakɛ naasɛ-mɔ ʊn mɛn-ʊt ru, ʊn yish-m ru nɛ, da-o a caagɛ à. Mɛ m-hogɛ ʊn reeb-o ʊn hyan-o ru komo, remen ʊm nak wɔa ru zak-o hoot mɛ.

⁵ ʊm bakɛ ʊnze o shɛrɛg be-ʊr Yɛso **Kiristi**, ʊn hur-ʊr gaan. Wʊ matɛ inu ru Yunis à, ʊn inu ʊn wʊ, Royis, yɛ ba'ag wɔ m-shɛr ʊn hur-ʊr gaan. ʊm dɛk ʊn hur ʊn de, ʊnze o shɛrɛg be-de ʊn wʊ tomso nɛ.‡

⁶ Remen kaanɛ o, mɛ wɔ m-bakɛ o nom m-'wɔns ʊn ka myot-se Shir ya'ʊ wɔ à, tomso nɛ, o ma'as ʊn nom ʊn sɛngɛ-mɔ Shir ya'ʊ wɔ à, kom-ʊt yoor. Da-o ʊm huʊ wɔ kom-to o-kwum à, Shir ya'ag wɔ beeb-de ʊn nom ʊn ka sɛngɛ-mɔ.

⁷ Mɛ ʊn zɛɛ kaanɛ remen **Kukt-o Shir** ya'ʊ na à, o na m-rwɔ a hogutɛ o-gyer á. Amba o na m-'ya ʊr-beeb de ʊn guw-mɔ Shir, ʊn was ʊn hun-nɛ nɛ, ʊn bɔ a he garamɛ ʊn hi ʊn na ʊr-bon nɛ à.

⁸ Remen kaanɛ, wɔ hogɛ 'e-mɔ ʊn rwɔr ʊn ma-ʊt Wan-Kɔyan na á. Komo wɔ hogɛ 'e-m re, mɛ wʊ a ka'e remen Wan-Kɔyan á. Amba jɔɔsɛ ʊn mɛ nɛ, be-de ʊn swɔ ʊr-koɔb remen ka **Ma-to m-Rerem** to. Shir a 'ye wɔ 'wɔns-mɔ m-nom kaanɛ.

⁹ Shir guug na, wʊ bandʊ na, a she'ettɛ she'et-de ʊn ba m-kukop. Wʊ ʊn band na, yanze remen sɛngɛ-mɔ ʊr-bon mɔ a m-nom á. Amba wʊ ʊn band na, remen wʊ ʊn hi ʊn de ʊn wʊ zɔngsɛtɛ wʊ nomot kaanɛ, komo remen wʊ kututʊ na yar-mɔ Shir ʊn ka bu-yo. Rii-yo Shir nomot hono o-dak, wʊ kututʊ na yar-mɔ ʊn wʊ, ʊn bu-yo ʊn

‡ **Bɔr-o gaan:5 1:5** Hyen komo: Sɛng 16:1.

tɔm ɔn **Kiristi** Yeso ɔn ka dak-o.

¹⁰ Amba m-moka, Shir kutute na yar-mo ɔn wu, be-de ɔn haan-m **Kiristi** Yeso **Wan-Gwu** na. Yeso wu saburse 'wɔns-mo m-mar. Komo da-o Yeso ruru na **Ma-to m-Rerem** à, wu kutu na ka hoog-o ba m-ta o cas.

¹¹ Remen ka **Ma-to m-Rerem** to, o Shir daaguntu me. Shir ɔn daag me um waragte ko-yan-ko'ot ɔn Ma-to ɔn wu, ko-yan-Tom Yeso, ɔn komo wan-yoose ɔn hun-ne ne bo a he dore ɔn Yeso **Kiristi** à. §

¹² Remen me ɔn rure hun-ne Ma-ut Yeso **Kiristi**, o rwo'e um rotte m-swo ur-koob kane ke'o. Amba myet ɔn kaane ne, me m-hoge m'e á. Remen um nepste ɔn wu um sherte à. Komo um nak wua was ɔn me ne, ɔn kap rii-yo wu yase me ur-gut à, har ha-mo ɔn ka ho-de ɔn piish ut-ma de.

¹³ Bop ka yoos-de o-nip de, kom-ut yoor, ka de o hoge be ɔn de à. O dore sha-mo ɔn yoos ɔn de. Nom kaane m-sher, m-was ne, mo **Kiristi** Yeso ya'su wo à.

¹⁴ Bop ka yoos-de o-nip de kom-ut yoor, de Shir ya'su wo à. **Kukt-o Shir** o ro ur-she'et n-me ɔn hur-ur na à, oa gu na m-was ɔn ka yoos-de o-nip de ne.

¹⁵ O nepse unze **yan-dor Yeso** kap, ye ro ɔn dak-o o-Asiya tukute me o-cin. Har ɔn Pajerus ne ɔn Hamojenis ne, ye tukute me o-cin.

¹⁶ Me us-kon Wan-Koyan kute yan-hur-o Onesiporus ne 'wɔn-de ɔn wu. Me us-kon kaane,

§ **Bɔr-o gaan:11 1:11** Hyen komo: 1Tim 2:7.

remen koyanda wu rɔ me un 'ya un jaab-o ʉt-men. Komo wu hogɛ 'e-mo m-haan wu hyenet me ke'o á.

¹⁷ Amba bo wu woone bo-o o-**Roma** à, wu hooburu me ba m-naas o-da, se da-o wu hyane me à.

¹⁸ Remen kaane, me ʉs-kon Wan-Koyan kute wu 'won-de un wu un ka ho-de un piish ʉt-ma de! Wo un hi un du o nepse, da-o um ro un bo-o o-Apisu à, wu guug me.

Bɔr-ʉs yoor

Ko-karma Yeso Kiristi, wu o-nip

¹ **Timoti**, wo untun wa re wu. O ma'as un nom un jaab-o ʉt-men be-de un yar-mo Shir, mo **Kiristi** Yeso ya'u wo à.

² O hogute me un yoose un hun-ne ma-ʉt **Kiristi**. Um yoosute hun-ne ka ma-to un co-o un ya-ʉs-tor deen. Um conog o yoose hun-ne ye o-nip gon ka ma-to. Ye he m-hoks un yoose un ye ken hun-ne komo à.

³ Nom ʉr-joose un te ne, be-de un swo ʉr-koob, untun ko-karma-wu ʉr-bon, wu ma Yeso **Kiristi**.

⁴ Ko-karma ro'e be-de un senge-mo un wu. Wu rɔ m-rwo un hi un de un wu, n-me un rem-se rɔ se un karma-ne á. Amba con-mo un ko-karma mo, wu ru wan-co o un wu hogɛ rerem-mo un wu.

⁵ Ka rɔ tomso ne be-de ʉt-mur, yatt-wu a he maag o-keeg á, se wu dorute jor-se un ka mur-to.

⁶ Ka rɔ tomso ne ko-wa-o-kat wu nome senge-mo un wu bo a cone à. Wu depe wu be m-kum kwukwur-de un rem-se o-kat.

7 Nɔm ʉs-barag ʉn tɔ ka ma-tɔ ʉm gendu wɔ à. ʉrege o nɔmog kaane, Wan-Koyan wua 'ye wɔ ʉs-nap, ʉn ka ma-tɔ kap.

8 Baks ʉn bɔ Yeso **Kiristi** rɔ à. Wu Shir 'yonse ʉt-marimar à, wu rwuune ʉn baag-o **Dawuda** à, ka **Ma-tɔ m-Rerem** tɔ, tɔ ma **Kiristi**, tɔ me m-ko'ote ʉn hun-ne à.

9 Remen me ʉn ko'ot ʉn ka **Ma-tɔ m-Rerem** tɔ, o hante ʉm rotte ʉn swɔ ʉr-koob. M-moka me ke'o untun wu nome **ur-ba'as** à. Amba yatt-wu he hoks m-gaag ʉn Ma-tɔ Shir á.

10 Remen kaane, ʉm nɔmog ʉr-joose ʉn swɔ ʉr-koob ʉn kɔ yo ke rii-yo. ʉm ko'ote ka ma-tɔ, remen hun-ne ye Shir daage à. Remen ye, ʉn ce ʉn ye, ye kumut gwu o a m-kum be-ur **Kiristi** Yeso à, komo ye cuw be-de ʉn ka seps-mɔ ʉn ba m-ta mɔ.

11 Ka ma-tɔ nip-o, tɔ rɔ m-zee,
ʉrege net marag ʉn **Kiristi**,
wua nɔm m-hoog ʉn Yeso ne tomso ne.

12 ʉrege net nɔmog ʉr-joose ʉn swɔ ʉr-koob rem
Yeso,
wua nɔm ʉt-gwomo ʉn Yeso ne.

Amba ʉrege net nɔmog she-mɔ ʉn nap ʉn Yeso,
Yeso a nɔm she-mɔ ʉn nap ʉn ka net-wu.*

13 ʉrege net ko-wa-o-nip-wu be-ur Yeso á,
Yeso rɔ m-barme á, wu rɔ ko-wa-o-nip.
Remen Yeso a nɔm she-mɔ ʉn hi ʉn de ʉn
wu á.

*Ko-ya-m-senge-wu Shir rɔ m-hoge
ʉn rerem-mɔ ʉn wu à*

* **Bɔr-ʉs yoor:12 2:12** Hyen komo: Mati 10:33; Ruka 12:9.

14 O ma'as yan-dor m-bakse un ka ma-to um zee à, komo o nek ye ut-to remen Shir. Taase ma-to sunu ye, remen yo gom-ut ro m-zee à. Remen gon ka sun-e-mo ut-ma mo ro m-hante rem-se o-hwaa. Komo to ro un hante un naase-mo ut-men be-de un ye ro to m-hoge à.

15 Nom bo un nom-m ru, bo Shir hette m-ho'os o-wur un wo ne à. O warag ko-ya-m-senge, wu ro m-hoge 'e-mo un senge-mo un wu á. Komo o ma'as un yoos un gom-de o-nip hond hond.

16 O som nom un ma-to o-hwaa to un ba ur-hi. Hun-ne ye ro un nom un ma-to o-hwaa à, ro m-warag yan-koob-de o-dorotte o Shir.

17 Yoos-de un ye ro m-ha ko kene untun caari-o o-nat, o ro m-ti un ap-mo o-wur à. Himeniyus un Peretus ne, ye ro un gon ka yoos-de.

18 Ka nen yoor-ye, yagute sher-mo o-nip mo ye rotte à. Ye zee unze Shir be'este wu 'yonsute yan-dor ut-marimar. Remen kaane, ye ro un rwo un ye ken yan-dor ye yage m-she be-ur **Kiristi**.

19 Amba hun-ne ye Shir sa o zee shi'it-de ro m-nukte á ye ro. Be-de un ka shi'it-de Shir geneg: "Yawe nak hun-ne ye ro ye ma un wu à."† Komo Ma-to Shir zee, "Da-o wu ken, wu zee ye, 'Yawe wu ro Wan-hur re.' Ka net-wu, se wu yage nom **ur-ba'as**."‡

20 N-me un den-o un ko-wan-hwor, sheend-ut ro kon to un ma-to o-zinariya, to ken sheend-to ro kon komo to ut-ba. Ka sheend-to o-zinariya to, hun-ne un ess-to remen senge-mo un ho-de

† **Bqr-qs yoor:19 2:19** Hyen komo: Qog 16:5. ‡ **Bqr-qs yoor:19 2:19** Hyen komo: Isha 52:11.

o-biki. Ka to ut-ba to ne hun-ne un ess-to remen senge-mo un ho-de o-hwaa.

²¹ Kaane ro be-de un ko-yan-dor-wu wongse hi un de un wu be-de un ka rem-se o-hwaa se à, wua warag sa o zee sheend-to Shir esse remen ho-de o-biki à. Wu waragte ba m-kukop, Shir a hoks nom m-senge un wu ne. Komo zongse wu ro remen wu nomot ko mo ke gon senge-mo ur-bon mo.

²² **Timoti** nom ja, un nom un rem-us yo-se ne, se yan-campo-ne ro m-con m-nom à. Ma'as un nom un rii-yo ro so-yo à. Senge m-sheer be-de Shir, m-was ne, un she'et-de ba ut-ween ne. Nom un gon ka rem-se, un myet ye ro us-kon be-ur Wan-Koyan un hur-ur gaan à.

²³ Da-o hun-ne ro un sune-mo ut-ma to o-hwaa to rotte ur-hi á, o nom ja un ye ne. Nom ja remen wo un hi un du o nepse gon ka ma-to ro m-hante ut-ween.

²⁴ Taase wan-senge-m Wan-Koyan wu ma'as un moor-to ut-ween á. Amba wu gut kowan un gwugwer-mo ur-hi ne, komo wu hoks m-yoos yo Ma-to Shir zee à, un mo un hur-de un wu ne.

²⁵ Ka da-de, n-me un gwugwer-mo ur-hi, wu kewes ye ro un yage-to un yoos-de un wu à. O ken da-o Shir a 'ye ye o-da, ye waktune be-de un wu, ye nep yo nip-o ro à.

²⁶ Ka da-de, yea muun un barag-se un ye, ye kumut m-posse be-de un ceeb-o un **ko-Gwomo-wu un ya-ut-kot**. Wu ro shikke ye un o à, remen ye nomot yo wu cone à.

Bor-us tet

She'et-de un hun-ne un kom-de o-da

1 Timoti, um conog o nep unze un ho-to ur-kom, hun-ne a su ur-koob deen.

2 Yo rwo'e um zeet kaane à, remen:

Hun-ne yea ma'as yan-con-to un hi un de un ye temb.

Yea ma'as yan-con-to un hwor,

Ya-us-ses,

Yan-nu-mo ur-hi,

Ya-ut-reeb,

Yan-koob-de o-dorotte o un ye mate ye à,

Yan-nu-se un o-kiit,

Yan-koob-de un gyer-o Shir.

3 Yan-koob-de m-was un hun-ne ne,

Ya-m-ees un or re un ye ne ur-hur,

Yan-we-to hun-ne,

Yan-koob-de un garamse un hi un de un ye,

Ya-m-zwom,

Ya-ur-shoob un kap rii-yo ro so-yo à.

4 Ya-m-re o-ra,

Ye ro un nom un rii ba m-ceker un yo he m-kor à,

Ye ro shiishe un nu-mo ur-hi ne,

Yan-con-to un hoge un rerem-mo un hi un de un ye arge con-to Shir,

5 Ye ro m-nom sa o zee ye un dorotte-o Shir.

Amba ye m-con Shir ja'as rem-us yo-se, se ye ro m-nom á.

Nom ja un gon ka hun-ne ye ne.

6 Yo rwo'e um zeet o nom ja un gon ka hun-ne ye ne à, remen ye ken ye ro m-raks hun-ne remen ye tuwut hur-to un ye. Ye m-nom un kaane remen ye garamsuté ne'a-ne ye m-raag.

Ka ne'a-ne ye **ba'as**-ut daag un hi-to un ye, komo con-to un nom un rem-us yo-se garamsute ye.

⁷ Koyanda a ro ye m-yoose, amba myet un kaane ne, ye wo m-nap un yoos-de o-nip a.

⁸ Ye ro untun Jenis un Jambaras ne ye nome **Mosa** ur-shoob n-ga n-ga a. Ka bo-se o, ka hun-ne ye ro ur-shoob un rii-yo ro o-nip a. Barag-se un ye rott ur-bon a, sher-mo un ye komo mo ut-bo mo.*

⁹ Amba yea hoks raks un hun-ne un ya o-da hiin. Remen ba m-jime deen, kowan he m-hyan un rem-se o-hwaa se un ye cas, untun bo kore un Jenis ne un Jambaras a.

Burus nak Timoti ut-to

¹⁰ Amba wo, **Timoti**, o nepsu ur-bon ne, yo me m-yoose un hun-ne a. O nepsu komo bo um nome she'et un de a. O nepsu yo um cone um nom a. O nepsu um shereg be-de Shir. O nepsu me un 'mo ur-hur un hun-ne ne, komo me un was un hun-ne. Komo o nepsu um joosute us-rem deen.

¹¹ O nak hun-ne ya'ag me ur-koob. O nak komo rem-us yo-se se kumu me n-me bo-to o-Antakiya, o-Ikoniya ne, o-Risiya ne. O nak hun-ne ya'ag me ur-koob, amba um joosute, Wan-Koyan Yeso guug me be-de un ye kap.†

¹² Kap wu cone wu nom gon she'et-de Shir cone a, wu sher be-ur **Kiristi** Yeso, wua su ur-koob be-de un hun-ne.

* **Bor-us tet:8 3:8** Hyen komo: Rwuu 7:11. † **Bor-us tet:11 3:11** Hyen komo: Seng 13:14-52; Seng 14:1-7; Seng 14:8-20.

13 Amba yan-men-ut jaas-to, un ya-ut-raks ne, she'et-de un ye ur-yo-de a do m-ha n-co n-co. Ye ro un raks un hun-ne, un ce un ye, a ye ut-raks.

14 Amba wo, senge m-sheer be-de o-nip o a yoose wo à. O sheer hur un du un o ne deen, remen o nepse ka ye yoose wo à, woa hoks wos ur-be un ye ne.

15 O nak Ma-to Shir cin da-o o ro'e wa rek-wu à. Ma-to Shir a hoks wo m-'ya us-nap unze se o shereg ur-hur be-ur **Kiristi** Yeso, ka da-de ne wu he wo m-gwu.

16 Kap Ma-to Shir to ro gense à, to un rwuun be-de Shir. To ro un gwu ne be-ur na:

Be-de un yoose un hun-ne,
un kwos un ye ba'ase ne à,
un ja'as un ye nome **ur-ba'as** à,
un yoose hun-ne bo ye he she'et-de ur-bon à.

17 Shir un ya'as na Ma-to un wu remen kap net-wu ro wu Shir à, wua ma'as zongse, wu nomot ko mo ke gon senge-mo ur-bon mo.

Bɔr-ɔs nass

1 Um mossute wo un Shir ne, un **Kiristi** Yeso ne. Baks wu he piishe un yan-hoog un margan-ne ut-ma à. Komo baks wu roon wu nomot ut-gwomo to un hono o-dak.

2 Me, Burus, ro wo m-zeë o ko'ot Ma-to Shir. Zonge o ko'ot Ma-to Shir, da-o hun-ne cone m-hoge à, komo un da-o ye cone ye hoge á. O rure hun-ne ye ja'as, da-o ye nome yo depe á, o kwos ye. O do ye jaab-o ut-men, ye senge un nom un rii so-yo. Nom ka rem-se un 'mo ur-hur, komo o ma'as ye m-yoose un Ma-to Shir.

³ Me w_o m-rurē un ka ma-to remen da-o roon, o hun-ne a cun ye hōge yoos-de o-nip á. Amba yeā nom rem-ús yo-se se hur-de un ye cone à. Komo yeā raks to-to un ye be-de yan-yoos-de ut-bo. Ka yoos-de ro ye m-rurē yo to-to un ye cone m-hoge à.

⁴ Hun-ne a nom gop-de un hōge o-nip un Ma-to Shir á, amba yeā ke to-to un ye be-de ut-zwom to o-hwaa.

⁵ Amba w_o **Timoti**, o garamse hi un du koyanda. O 'mo ur-hur, da-o un sw_o ur-koob. O nom senge-mo un ko-ya-m-Rwor un **Ma-to m-Rerem**, to Shir. O nom senge-m ru ur-bon ne, mo Shir ya'asu w_o, o nom à.

⁶ Hoog-m re, a ya'aste mo untun ur-seke de m-sw_o be-de Shir. Da-o um he m-yage un mo ka hoog-mo à, nomoste.

⁷ Um sha'ag kashi ut-mur, um komog senge-mo Yeso **Kiristi**, yase me um nom à. Komo, um ma'aste m-bop un **Ma-to m-Rerem** kom-ut yoor.

⁸ M-moka Shir essute me 'yons-ur kashi n-ton o-shir, remen um sengute m-sher be-de un wu. Wan-Koyan wan-piish ut-ma wu o-nip, wua ya'as me ur-'yons un ka ho-de un piish ut-ma de. Me wu cot Wan-Koyan he m-ya'as un ka 'yons-de un hon-de á. Amba Shir a 'ye hun-ne ka 'yons-de, komo myet un ye ro ur-gop ye hyenet mun-mo un wu à.

Burus conog Timoti gu wu

⁹ **Timoti**, koyan w_o m-nom, o nom kyak, o haan be un de hor-m-hor.

10 Um conog o haan remen Dimas wongute un me ne. Wu wongute un me remen gop-de un rem-se un hono o-dak. Wu neketē bo-o o-Tasaronika. Komo Kirezens Haag raag-o o-Garatiya. Titus komo wu haaru raag-o o-Darmatiya.*

11 Ruka wu cot ro kanē un hon-de un wu be un de. O hoob Markus, no haan no un wu ne remen wua hoks me m-gu deen, n-me un senge-m re kanē.†

12 Um tomog Tikokos ha-mo un bo-o o-Apisu.‡

13 Da-o um she'ete un bo-o o-Toruwās à, um yagnute cop-o o-huw un kom-ut Karbus. Hakkure, da-de o he m-haan à, o deknū me o. Komo o deknū me takurda-ut re. Wo bopre ka to a nome un ka-to un gwoor á.§

14 Ka ko-ya-o-pyap-wu Arekanda nomotu me rem-qs yo-se. Wan-Koyan a top wu bo un rem-qs yo-se se wu nome à.*

15 Wo ma o nom ceen un wu ne, remen wu ro ut-yage un yoos-ur na ne deen.

16 Da-de a taknū me m-hante be-de un ko-wan-piish ut-ma kanē un bo-o o-Roma à, um ruute hi un de be-de un ye ro me us-cetente à, yatt-wu su'e me á. Ye tukute me o-cin kap mo un ye. Um konog Shir sokse ye ka **ba'as-de**.

* **Bqr-qs nass:10 4:10** Hyen komo: Koro 4:14; Pmøn 24; 2Kor 8:23; Gara 2:3; Titu 1:4. † **Bqr-qs nass:11 4:11** Hyen komo: Koro 4:14; Pmøn 24; Seng 12:12,25; 13:13; 15:37-39; Koro 4:10; Pmøn 24. ‡ **Bqr-qs nass:12 4:12** Hyen komo: Seng 20:4; Apis 6:21-22; Koro 4:7-8. § **Bqr-qs nass:13 4:13** Hyen komo: Seng 20:6. * **Bqr-qs nass:14 4:14** Hyen komo: 1Tim 1:20; Bqng 62:12; Roma 2:6.

17 Myet ʉn kaane ne, Wan-Koyan rɔ eso ʉn me ne. Wʉ ya'ag me ʉr-beeb, har ʉm hokste kɔ'ot ʉn ka **Ma-to m-Rerem** tɔ, tɔ ma Yeso **Kiristi**. Hun-ne ye rɔ **Yahuda**-ne á rɔ kane ye hogute tɔ. Komo Wan-Koyan guug me sa o zee wʉ posse m-mar ʉn nu-o o-zur à.

18 ʉm nepste Wan-Koyan wʉa ruut me ʉn ko yo ke rii yo-yo yo. Wʉa 'er me, wʉ woot me be-de ʉn gwomo-tɔ ʉn wʉ tɔ n-Ton o-shir. Yage a bumut Wan-Koyan, har da-o ba m-ta! **Amin**.

Gas-de ʉr-kom

19 Hakkure o gassu me Biskira, ʉn campo ʉn wʉ ne Akira.

O gassu me komo, yan-den-o Onesiporus ne.†

20 Erastus rɔ kon har m-moka n-me bo-o o-Korinti, komo ʉm yagnute Taropimus n-me bo-o o-Miritus wʉ piishe á.‡

21 Koyan wɔ m-nom, o nom kyak, o haan be ʉn de rii-yo huw-o woonte. Or na ne yan-dor kap, rɔ nɔ ʉr-gas. Yuburus ʉn Pudens ne, ʉn Rayinus ne, ʉn Karawudiya ne, ye rɔ nɔ ʉr-gas komo.

22 Wan-Koyan rɔ ʉn wɔ ne! Yar-mɔ Shir rɔ ʉn nɔ ne!

† **Bɔr-ʉs nass:19 4:19** Hyen komo: Seng 18:2; 2Tim 1:16-17.

‡ **Bɔr-ʉs nass:20 4:20** Hyen komo: Seng 19:22; Roma 16:23; Seng 20:4; 21:29.

ut-Hun New Testament

Hun-Saare: ut-Hun New Testament New Testament

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

PDF generated using Haiola and XeLaTeX on 28 Dec 2024 from source files dated 29 Jan 2022

4b40cd80-7cb8-5d3d-8563-557f030f99d7